

金匱要略註解

九



金匱要略註解卷之十七


嘔吐噦下利病脉證治第十七

論一首 脉證二十七餘 方二十三首

夫嘔家有癰膿不可治嘔膿盡自愈

嘔家有癰膿者肺癰而嘔者也嘔吐噦三者誤說者由來久矣近代張景岳獨其辨詳矣而文繁不能記之學者考之可矣

先嘔却渴者此為欲解却嘔者為水停心下此屬飲家嘔家本渴今反不渴者以心下有支飲故也此屬支飲



合醫要略卷十七
嘔而物去陽氣發故渴知是欲解先渴後嘔者因
渴飲水其水停心下為支飲也

問曰病人脈數數為熱當消穀引食而反吐者何也
師曰以發其汗令陽微膈氣虛脈乃數數為客熱不
能消穀胃中虛冷故也

數本為客熱消穀不能消穀而脈數者上焦氣虛
微而陽氣不收令然因誤發汗陽微膈氣虛胃中
亦虛冷也

脈弦者虛也胃氣無餘朝食暮吐變為胃反寒在
上醫反下之今脈反弦故名曰虛

因誤下胃中虛不能消食故朝食暮吐或云虛天
氏曰其稿在上焦水飲可行食物難入間入不多
名噎其稿在中焦食雖入難盡入胃良久復出各
隔其稿在下焦朝食暮吐暮食朝吐大便秘如羊
屎名反胃巢氏病源云霍亂有三名一名胃反言
其胃氣虛逆反吐飲食也故反胃胃反有辨而反
胃者死證胃反可治愚謂仲景已言朝食暮吐暮
食朝吐則胃反亦惡候難治無異可知
寸口脈微而數微則無氣無氣則榮虛榮虛則血不
足血不足則胸中冷

仲景論嘔吐反胃爲此言者其肯遂矣今見反胃者七情傷氣氣不行榮血亦乾燥胸中窄食物滯瀉爲噎膈甚不治爲反胃死然則反胃之本因血不足而胸中寒塞也其治不養血欲求驗可乎舟橋一勇爲僧名止順三十餘歲食物下胸膈如鍼刺屈仰難降二年久將爲穢胃米穀不全納但噉熟柿甚狀予脈之微而數是仲景所謂榮虛則血不足者是也與四物湯去川芎倍當歸加半夏山卮子十貼而知至三十貼全愈

跌陽脈浮而濇浮則爲虛濇則傷脾脾傷則不磨朝

食暮吐暮食朝吐宿穀不化名曰胃反脈緊而濇其病難治

跌陽胃脈也其脈浮濇緊皆脾胃虛極之候也故曰難治

病人欲吐者不可下之

病在上攻下誅罰無過其害已

噦而腹滿視其前後知何部不利利之即愈

噦吃逆也吃逆而腹滿者或前或後當有不利之處各治其所則逆氣自下也

嘔而胸滿者茱萸湯主之

嘔而胸滿者茱萸湯主之

茱萸湯方

吳茱萸 一升 人參 三兩 生姜 六兩 大棗 十二枚

右四味以水五升煮取三升溫服七合日三服

汪機曰治中氣不足胃中虛寒食穀欲嘔治宜神中溫胃可也經云寒淫於內治以甘溫佐以苦辛是以用人參以補中吳茱萸生姜溫胃而止嘔○愚按嘔能損氣故用人參吳茱萸辛熱能降氣兼降肝火

乾嘔吐涎沫頭痛者茱萸湯主之 方見上

吳茱萸足厥陰肝經藥也止上逆治頭痛人參大

棗補氣生姜去痰除寒乾嘔自愈

嘔而腸鳴心下痞者半夏瀉心湯主之

半夏瀉心湯方

半夏 半升 黃芩 三兩 乾姜 三兩 人參 三兩

黃連 一兩 大棗 十二枚 甘草 三兩

右七味以水一斗煮取六升去滓再者取三升溫

服一升日三服

瀉心者瀉心下邪也半夏以除痰下痞邪滌心下心火箭逆故黃芩黃連除火箭乾姜以溫腸胃大腸鳴者止人參大棗甘草甘和補元氣則

氣不妄逆上而嘔自止

乾嘔而利者黃芩加半夏生姜湯主之

黃芩加半夏生姜湯方

黃芩 三兩

甘草 二兩

芍藥 二兩

半夏 半升

生姜 三兩

大棗 二十枚

右六味以水一斗煮取三升去滓溫服一升日再

夜一服

半夏止嘔黃芩除腸熱芍藥收脾生姜去痰治

嘔大棗和諸味而後嘔利皆愈

嘔吐而病在膈上後思水者解急與之思水者猪苓

散主之

膀胱津液之府也飲在下焦膀胱氣不運故嘔吐

後思飲水與之則解用猪苓散利小便則津液生

而安

猪苓散方

猪苓

茯苓

白朮 各等分

右三味杵為散飲服方寸匕日三服

嘔而脈弱小便復利身有微熱見厥者難治四逆湯

主之

此證皆元陽虛寒侵脾腎而然故用此方以溫脾腎

四通湯方

附子 一枚 生用 乾姜 一兩 炙 甘草 二兩

右三味以水三升煮取一升二合去滓分温再服
強人可用附子一枚乾姜三兩

禮記云四十曰強強人猶言強壯人也非稟質
厚之人也身軀巨大者增其劑

嘔而發熱者小柴胡湯主之

此傷寒少陽症也先哲言之者多今不贅於此

小柴胡湯方

柴胡 半斤 黃芩 三兩 人參 三兩 甘草 二兩

半夏 半斤 生姜 三兩 大棗 十一枚

右七味以水一斗二升煮取六升去滓再煎取三
升温服一升日三服

胃反嘔吐者大半夏湯主之 千金云治胃反不受食
食入即吐外臺云治嘔

心下痞
鞭者

反胃證原其所由七情鍾痰久為瘀血而胸膈
結不容食腸胃乾燥胃口澁而不下食雖入又出
半夏以開胃口其力欲健不用群類反胃無食氣
則恐胃氣竭故用人參助補元氣白蜜滑腸胃之
燥澁異亦有救之勿為廢症而居見其斃

大半夏湯方

半夏二升洗 人參三兩 白蜜一斤

右三味以水一斗二升和蜜揚之二百四十遍煮取二升半溫服一升餘分再服

食已即吐者大黃甘草湯主之外臺方又

此下焦有濕熱之症故此方主之

大黃甘草湯方

大黃四兩 甘草一兩

右二味以水三升煮取一升分溫再服
胃反吐而渴欲水者茯苓澤瀉湯主之

此膀胱有積飲與五苓散之意同法

茯苓澤瀉湯方外臺云治消渴脈絕胃反吐食又有小麥一升

茯苓半斤 澤瀉四兩 甘艸二兩

桂枝二兩 白朮三兩 生姜四兩

右六味以水一斗煮取三升內澤瀉再煮取二升半溫服八合日三服

吐後渴欲得水而食飲者文蛤湯主之兼主微風脈緊頭痛

文蛤湯方

文蛤五兩 麻黃三兩 甘草三兩 生姜三兩

石膏五兩 杏仁五十枚 大棗十二枚

右七味以水六升煮取二升温服一升汗出即愈
邪在肺故渴飲水文蛤杏仁降肺氣麻黃生姜
去肺邪石膏潤胃中甘草大棗和胃渴止邪去
吐自愈

乾嘔吐逆吐涎沫半夏乾姜散主之

此亦痰飲故去痰温胃此方主之

半夏乾姜散方

半夏 乾姜 等分

右二味杵為散取方寸匕漿水一升半煎取七合

頓服之

病人胸中似喘不喘似嘔不嘔似噦不噦徹心中憤
憤然無奈者主之生姜半夏湯主之

此亦痰飲之症也憤悶也

生姜半夏湯方

半夏半斤 生姜汁一升

右二味以水三升煮半夏取二升内生姜汁煮取
一升半小冷分四服日三夜一服止停後服

乾嘔噦若手足厥者橘皮湯主之

肺寒而手足厥者去寒邪降肺氣故此方主之

橘皮湯方

橘皮 四兩 生姜 半斤

右二味以水七升煮取三升溫服一升下咽即愈
噦逆者橘皮竹茹湯主之

橘皮竹茹湯方

橘皮 二升 生姜 半斤 竹茹 二升
大棗 三十枚 甘草 五兩 人參 一兩

右六味以水一斗煮取三升溫服一升日三服
吳昆曰呃逆者由下達上氣逆作聲之名也大
病後則中氣皆虛餘邪乘虛入裏邪正相薄氣

必上騰故令呃逆脈來虛大虛者正氣弱大者
邪熱在也是方橘皮平其氣竹茹清其熱甘草
和其逆人參補其虛生姜正其胃大棗益其脾
夫六腑氣絕於外者手足寒上氣脚縮

手足諸陽之本也六腑氣絕於外者陽氣之絕故
手足寒陽者盛則下衰則上故上氣脚縮
五臟氣絕於內者利不禁下甚者手足不仁
臟氣之絕不保故利不禁也下不止則胃氣亦竭
手足不仁也蓋胃氣受穀味布手足經衰竭不能
布故不仁也

下利脉沉弦者下重

沉弦者下焦有積滯故裏急後重也

脉大者為未止

下利脉大者邪未去利何止耶

脉微弱數者為欲自止雖發熱不死

下利多者雖寒濕去陰氣自衰之故脉微弱數而又發熱然寒盡當愈

下利手足厥冷無脉者灸之不溫若脉不還反微喘者死

微喘者氣之絕不及息也

少陰負趺陽者為順也

少陰負趺陽者猶言少陰脉弱小於趺陽也少陰者腎脉大谿是也下利多者胃氣衰故趺陽脉微弱也大谿反不然而元陽未竭也故為順蓋古人寸口已絕以大谿趺陽腎間動氣驗生死其法詳見難經注

下利有微熱而渴脉弱者今自愈若下利脉數有微熱汗出今自愈設脉緊為未解

有微熱而渴及汗出者濕寒去陽氣發雖脉弱數猶當愈若脉緊者寒未去故為未解

下利脉數而渴者今自愈設不差必清膿血以有熱故也

陽氣發則當脉數而渴故知自愈設不差則有熱結清膿血之症也

下利脉反弦發熱自汗者自愈

發熱自汗陽氣發生胃氣迴雖脉弦自愈

下利氣者當利其小便

氣者脉經作熱者是也因小便不利而水穀不分膀胱籌而發熱

下利寸脉反浮數尺中自濇者必清膿血

寸脉浮數有熱尺脉自濇有滯血必當有清膿血也
下利清穀不可攻其表汗出必脹滿

攻表汗出則亡陽亡陽則胃氣塞必當為脹滿也
下利脉沈而遲其人面以赤身有微熱下利清穀者必斂冒汗出而解病人必微熱所以然者其面戴陽下虛故也

面赤微熱者因有微邪斂冒故汗出則解戴陽者言額上赤色也與戴眼之意同
素問診要經終篇類註云戴者戴於上也此下虛而上逆故也

下利後脉絕手足厥冷時時脉還手足溫者生脉不

還者死

昏時一周時也

下利腹脹滿身體疼痛者先溫其裏乃攻其表溫裏宜四逆湯攻表宜桂枝湯

腹脹滿故溫裏身軀疼痛故攻表

四逆湯方 見上

桂枝湯方

桂枝 三兩 去皮

芍藥 三兩

甘草 二兩 炙

生姜 三兩

大棗 十二枚

右五味㕮咀以水七升微火煮取三升去滓適寒

溫服一升服已須臾啜稀粥一升以助藥力溫覆令一時許遍身發熱微似有汗者益佳不可令如水淋漓若一服汗出病瘥停後服
發熱微汗貌

下利三部脈皆平按之心下堅者急下之宜大承氣湯脈平而言急下之者何也雖脈平心下堅者實也若治遲漫則內邪不去而脈必致虛急一字宜味若至脈虛則縱心下堅不能下
下利脈遲而滑者實也利未欲止急下之宜大承氣湯滑脈必有內邪故下之

下利脉反滑者當有所去下乃愈宜大承氣湯
下利後其脉當微弱反滑者有邪之可去也
下利已差至其年月日時復發者以病不盡故也當
下之宜大承氣湯

歷年月日時後復發者餘邪未盡也

下利讞語者有燥屎也小承氣湯主之

雖下利猶讞語者內熱結燥屎也下之則熱去讞

語止利自愈

小承氣湯方

大黃 四兩

厚朴 二兩

枳實 大者三枚

右三味以水四升煮取一升二合去滓分溫二服
得利則止

下利便膿血者桃花湯主之

桃花湯方

赤石脂 一斤一半剉 乾姜 一兩 粳米 一升

右三味以水七升煮米令熟去滓溫七合內赤石

脂末方寸匕日三服若一服愈餘勿服

傷寒論云少陰病下利便膿血者桃花湯主之

成氏註曰陽病下利便膿血者協熱也少陰病

下利便膿血者下焦不約而裏寒也與桃花湯

固下散寒瀉可去脫赤石脂之瀉以固腸胃辛
以散之乾姜之辛以散裏寒粳米之甘以補正
氣○汪機曰少陰症下利膿血此乃裡寒下焦
不約所致治宜扶胃固脫散寒可也是以用粳
米以扶胃赤石脂以固脫乾姜以散寒○吳崑
曰此證自三陽傳來者純是熱證成無已因其
下利而曰協熱因其用乾姜而曰裏寒豈謂不
然蓋少陰腎水也王禁固二便腎水為火所灼
不能濟火熱尅伐大腸金故下利且便膿血
此方用赤石脂以其性寒而澁寒可以濟熱澁

可以固脫用乾薑者假其熱以從治猶之白通
湯加入尿豬膽乾姜黃連黃芩人參湯用芩連
彼假其寒此假其熱均之假以從治爾內經曰
寒者熱之熱者寒之微者逆之甚者從之逆者
正治從者反治從少從多觀其事也正此之謂
用粳米者恐石脂性寒損胃故用粳米以和之
向使少陰有寒則乾姜一兩之寡豈足以溫而
石脂一斤之多適足以濟寒而殺人矣豈仲景
之方乎噫以聊攝之明猶且昧此則下聊攝者
可知矣○愚謂吳氏知成汪二子之非而有不

盡其餘縕矣此方也澁劑也宜救虛脫蓋少陰主下部下部太腸小腸是也邪入下部傷血故便膿血也石脂可以固虛脫乾姜可以補血梗米可以利胃而後血定而利亦止或曰若可用乾姜於補血之事何不用當歸溫耶曰當歸滑利而不宜泄利乾姜雖性熱上而不下故同用石脂止脫仲景之意遠矣今醫遇血利不知用此方而妄用芍藥湯等類不愈則坐見其殮那夫昧耶

熱利重下者白頭翁湯主之

白頭翁湯方

白頭翁 二兩 黃連 三兩 黃柏 三兩 秦皮 三兩

右四味以水七升煮取二升去滓溫服一升不愈更服

成氏曰利則津液少熱則傷氣氣虛下利致後重也與白頭翁湯散執厚腸內經曰腎欲堅急食苦以堅之利則下焦虛是以純苦之劑堅之○吳昆曰熱利者協熱而利下重者下利頻數而重也藥之為性寒者能除熱苦者能厚腸四件皆苦寒故治熱利而療下重也○王好古曰

痢則下焦虛故張仲景白頭翁湯以黃蘗黃連
秦皮同用皆苦以堅之也

下利後更煩按之心下濡者為虛煩也梔子豉湯主之
按傷寒論醫誤下之邪入心為虛煩者用此方然
則非止利之劑吐去心下邪則利自愈若吐之不
止則當用他方以治之

梔子豉湯方

梔子

十四枚

香豉

四合
綸裹

右二味以水四升先煮梔子得二升半內豉煮取
一升半去滓分二服溫進一服得吐則止

成氏曰酸苦湧泄為陰苦以湧吐寒以勝熱梔
子豉湯相合吐劑宜矣○吳昆曰梔子味苦能
湧吐熱邪香豉氣腐能剋制熱勢所謂苦勝熱
腐勝焦也

下利清穀裏寒外熱汗出而厥者通脈四逆湯主之
通脈四逆湯方

附子

大者一枚
生用

乾姜

三兩強人
可四兩

甘草

二兩
炙

右三味以水三升煮取一升二合去滓分溫再服
成氏曰此陰甚於內格陽於外不相通也與通
脈四逆湯散陰通陽

下利肺痛紫參湯主之

紫參湯方

紫參 半斤 甘草 三兩

右二味以水五升先煮紫參取一升內甘草煮取

一升半分溫三服 疑非仲景方

紫參去瘀血血痢之所宜也或曰紫參厥陰藥非肺痛之所關曰紫者赤黑間色乃心包其色也瘀血在心包則肺為之痛故與甘草緩火之物合之而火收血歸肺痛自愈不知此理疑非仲景方矣

氣利訶梨勒散主之

氣痢氣虛而痢者也故訶子能澁大腸氣虛者暫收瀉利亦當自愈

訶梨勒散方

訶梨勒 十枚煨

右一味為散粥飲和頓服 疑非仲景方

附方

千金翼小承氣湯治大便不通噦數譫語 上方見
大便不通噦譫語因熱在裏故下之
外臺黃芩湯治乾嘔下利

黃芩 三兩

人參 三兩

乾姜 三兩

桂枝 一兩

大棗 十二枚

半夏 半升

右六味以水七升煮取三升溫分三服

形寒飲冷傷脾胃者用此方治之故桂枝乾姜半夏辛溫溫脾胃表寒者必有上焦鬱熱黃芩能治上焦熱人參大棗補助脾胃氣而后乾嘔下利自愈也

金匱要略註解卷之十七終

金匱要略註解卷之十八

瘡癰腸癰浸淫病脉證并治第十八

論一首 脉證三條 方五首

諸浮數脉應當發熱而反洒淅惡寒若有痛處當發其癰

凡癰疽氣血凝滯而生經氣不行故洒淅惡寒

師曰諸癰腫欲知有膿無膿以手掩腫上熱者為有

膿不熱者為無膿

熱能腐物故為膿

腸癰之為病其身甲錯腹皮急按之濡如腫狀腹無

積聚身無熱脈數此為腹內有癰膿薏苡附子敗醬散主之

薏苡附子敗醬湯方

薏苡仁

十分

附子

二分

敗醬

五分

右三味杵為末取方寸匕以水二升煎減半頓服

小使
當下

薏苡敗醬能治內癰附子熱去積冷

腸癰者小腹腫痞按之即痛如淋小便自調時時發熱自汗出復惡寒其脈遲緊者膿未成可下之當有血脈洪數者膿已成不可下也大黃牡丹湯主之

陳無擇云癰疽初無定處隨其所發即命名在外則為發背發腦在內則為腸癰內癰心癰肺癰臍癰等證得其法則生失其法則死外證易識內證難明不可不備述也腸癰為病身甲錯腹皮急按之漉如腫狀腹無聚積身無熱脈數此為腸內有膿久積陰冷所成也故金匱有用附子溫之小腹腫痞按之痛如淋小便自調發熱身無汗復惡寒其脈遲緊者膿未成可下之當有血洪數者膿已成不可下此以內結熱所成也故金匱有用大黃利之甚者腹脹大轉側聞水聲或達臍生瘡或膿

從臍出或大便出膿血不治必死其如五内生瘡亦止分利陰陽而已不比外癰依四節八事之次第也脉經引官羽林婦病醫診之其脉滑而數滑則爲實數則爲熱滑則爲榮數則爲衛衛數下降榮滑上外榮衛相干血爲濁敗小腹痞堅小便或澁或時汗出或復惡寒膿爲已成設脉遲緊卽爲痲血血下卽愈更內經所載有息積病此見有得之二三年遍身微腫續乃大腸與臍連自出膿遂致不救此亦腸癰之類也不可不審

大黃牡丹湯方

大黃 四兩

牡丹 一兩

桃仁 五十枚

瓜子 半升

芒消 三合

右五味以水六升煮取一升去滓內芒消再煎沸頓服之有膿當下如無膿當下血

大黃芒硝瓜子苦寒除下焦熱牡丹皮桃仁去瘀血清血

問曰寸口脉浮微而澁然當亡血若汗出設不汗者云何答曰若身有瘡被刀斧所傷亡血故也浮數而澁亡血而陰虛之脉也然無亡血之證候故疑問之是廼因身有瘡與刀斧所傷之故也

病金瘡王不留行散主之

王不留行 十分八月

葫蘆細葉 十分七月

桑東南根 自皮十分三月三日採

甘草 十分

川椒 三分除目及閉口者汗

黃芩 二分

乾姜 二分

芍藥 厚朴 各二分

右九味桑根皮以上三味燒灰存性勿令灰過各別杵篩合治之為散服方寸匕小瘡即粉之大瘡但服之產後亦可服如風寒桑東根勿取之前三物皆陰乾百日

王不留行別錄云金瘡止血逐痛出刺葫蘆別

錄云治風瘡癭身癢濕痺桑根與筋去濕痺川椒除寒氣破血乾姜活血瘀血入腹者芍藥厚朴去之甘草以和諸藥凡諸瘡發肌表肌表肺之分故黃芩微寒以涼表氣是以用之附貼與服餌其旨深哉

排膿散方

枳實 十六枚

芍藥 六分

桔梗 二分

右三味杵為散取雞子黃一枚以藥散與雞黃相等揉和令相得飲和服之日一服
桔梗別錄云養血排膿枳實大明云散敗血芍

藥能治血雞子黃亦去膿起肌排膿之功可知耳

排膿湯方

甘草二兩 桔梗三兩 生姜一兩 大棗十枚

右四味以水三升煮取一升溫服五合日再服

浸淫瘡從口流向四肢者可治從四肢流來入口者不可治

入問云侵淫瘡初生甚小先痒後痛汁出浸淫濕爛肌肉延至遍身若從口發出流散四肢者輕從四肢發生然後入口者重浸淫漢書五王傳云事

寢淫聞於上師古註曰浸淫猶言漸洳也

浸淫瘡黃連粉主之方未見

金匱要略註解卷之十八終

金匱要略註解卷之十九

跌蹶手指臂腫轉筋陰狐疝蛇蟲病脈證治第

十九 論一首 脈證一條 方四首

師曰病跌蹶其人但能前不能却刺膈入二寸此太陽經傷也病人常以手指臂腫動此人身體羸弱者藜蘆甘艸湯主之

此段未詳

藜蘆甘艸湯方 未見

轉筋之為病其人臂脚直脉上下行微弦轉筋入腹者雞屎白散主之

脉上下行言如相引狀

雞屎白散方

雞屎白

右一味為散取方寸匕以水六合和溫服

別錄云雞屎白治腹中雄雞屎乃有白臘月收之

陰狐疝氣者偏有小大時時上下蜘蛛散主之

丹溪纂要曰言之狐疝其狀如瓦卧則入小腹行

立則出小腹入囊中狐則晝出穴而溺夜則入穴

而不通此疝與狐相類

蜘蛛散方

蜘蛛 十四枚 桂枝 半兩

右二味為散取八分匕飲和服日再服蜜丸亦可

別錄云蜘蛛治大人小兒癩癧疝也故加桂

枝引少陰厥陰

問曰病腹痛有蟲其脉何以別之師曰腹中痛其脉

當沉若弦反洪大故有蛇蟲

凡腹痛者多寒實故脉必沉弦反洪大以蟲動也

蛇蟲之為病令人吐涎心痛發作有時毒藥不止甘

草粉蜜湯主之

毒藥若苦辛殺蟲之藥也毒藥不應則為虛蟲可

知故甘劑主之。○醫學六要曰風字從虫風化也濕熱鬱久則生蟲腐草爲螢陳麥爲蛾之類菓實外殼完整虫生于內人之腸胃無物不受豈得無虫云九道理或有之其猖狂於腸胃爲痛爲嘔爲嗽爲嗜種種煩苦須仗醫藥至蛔蟲乃人之消化搬運者偶爲食傷則或吐或瀉出和中自安不可攻伐昧者不知妄用雷丸史君之類禍不旋踵
甘艸粉蜜湯方

甘艸 二兩

粉 一兩

蜜 四兩

右三味以水三升先煮甘艸取二升去滓內粉蜜

攪令和煎如薄粥温服一升差卽止
蛇厥者當吐蛇令病者靜而復時煩此爲臟寒蛇上入膈故煩須更復止得食而嘔又煩者蛇聞食臭出其人常自吐蛇
蛇厥者烏梅丸主之
烏梅丸方

烏梅 三百枚

細辛 六兩

乾姜 十兩

黃連 一斤

當歸 四兩

附子 六兩

川椒 四兩

桂枝 六兩

人參 六兩

黃蘗 六兩

右十味異搗篩合治之以苦酒漬烏梅一宿去核

蒸之レ五升米下飯熟レ搗成泥和藥令相得レ內臼中與蜜杵二千下レ丸如梧子大先食飲服十九レ三服稍加至二十九レ禁生冷滑臭等食

吳昆曰胃虛臟寒得食而嘔レ蛇從上出者此方主之烏梅味酸蛔得之而軟連柏味苦蛔得之而伏椒細味辛蛔得之而死乾姜附桂溫臟寒也人參當歸補胃虛也

金匱要略註解卷之十九 終

金匱要略註解卷之二十

婦人妊娠病脉證并治第二十

證三條 方八首

師曰婦人得平脉陰脉小弱其人渴不能食無寒熱名妊娠桂枝湯主之方見於法六十日當有此證設有醫治逆者却一月加吐下者則絕之

脉經曰腎名胞門子宮尺中腎脉也尺中之脉按之不絕法妊娠也然其脉小弱渴不能食者血弱而然故當以桂枝湯溫之蓋月水已絕二月而有此證醫不知誤治之却又一月而加吐下者與治

吐下之藥宜斷絕之六十日即是一月也

婦人宿有癥病經斷未及三月而得漏下不止胎動在臍上者為癥痼害

經斷得胎也胎動在臍上者胎不墮為癥痼痼疾也

妊娠六月動者前三月經水利時胎下血者後斷三月不血也所以血不止者其癥不去故也當下其癥桂枝茯苓丸主之

此因有癥而胎動也雖後三月不下血以前三月胎未固之時下血之故及至六月亦胎動血不止也桂枝茯苓丸方

桂枝

茯苓

牡丹去心

桃仁去皮尖熬

芍藥各等分

右五味末之煉蜜和丸如兎屎大每日食前服一丸不知加至三丸

桂枝芍藥牡丹桃仁共皆破瘀血茯苓引以陰下降所以其癥去也

婦人懷娠六七月脈弦發熱其胎愈脹腹痛惡寒者以腹如扇所以然者子臟開故也當以附子湯溫其臟方未見

此證疑寒破子宮乎然惜乎方未見

師曰婦人有漏下者有半產後因續下血都不絕者
有妊娠下血者假令妊娠腹中痛為胞阻膠艾湯主之
胞中因瘀血而阻絕是即半產而胎未墮盡之故也
芎歸膠艾湯方 一方加乾姜一兩胡氏
治婦人胞動無乾姜

芎藭 二兩 阿膠 二兩 甘草 二兩 艾葉 三兩

當歸 二兩 芍藥 四兩 乾地黄

右七味以水五升清酒三升合煮取三升去滓內
膠令消盡溫服一升日三服不差更作

芎藭當歸地黃芍藥四物湯也以治血病不可
缺艾葉止胎動阿膠能止漏血甘草和諸藥

婦人懷妊腹中疝痛當歸芍藥散主之
當歸芍藥散方

當歸 三兩 芍藥 一斤 茯苓 四兩

白朮 四兩 澤瀉 半斤 芎藭 半斤一作三兩

右六味杵為散取方寸匕酒和日三服

當歸芍藥芎藭四物湯也白朮能利血補脾蓋
腹痛胎動恐脾虛胎即墮故用之茯苓澤瀉利
膀胱膀胱與胞同其氣通則胎定腹痛止

妊娠嘔吐不止乾姜人參半夏丸主之
乾姜人參半夏丸方

乾姜 一兩 人參 二兩 半夏 一兩

右三味末之以生姜汁糊為丸如梧子大飲服十丸日三服

半夏止嘔乾姜溫胃嘔吐不止恐元氣虛乏而胎墮故用人參以補元氣

妊娠小便難飲食如故歸母苦參丸主之

當歸貝母苦參丸方 男子加滑石半兩

當歸 貝母 苦參 各四兩

右三味末之煉蜜丸如小豆大飲服三丸加至十丸當歸治血貝母本草曰治淋瀝亦肺經氣分藥

也能散心胸鬱結之氣苦參本艸曰治溺有餘瀝逐水二味能共通小便非如淡滲之劑瀉利膀胱有妨子宮也

妊娠有水氣身重小便不利洒淅惡寒起即頭眩葵子茯苓散主之

洒淅惡寒頭眩皆因有水氣然

葵子茯苓散方

葵子 一升 茯苓 二兩

右二味杵為散飲服方寸匕日三服小便利則愈茯苓淡利小便葵子淡滑治五癰利小便能入

子宮故妊婦之所宜用又所宜忌也
婦人妊娠宜常服當歸散主之
當歸散方

當歸

黃芩

芍藥

芍藥

白朮

各一
半斤

右五味杵為散酒飲服方寸七日再服妊娠常服
即易產胎無苦疾產後百病悉主之

醫學原理有人參曰治胎婦一切諸症蓋妊娠
之婦氣血凝聚胎元濕熱易於壅澀法當調養
氣血清理濕熱是以用川歸芍藥川芎白朮人

參養血益氣黃芩清熱又曰本無人參有香附亦妙
妊娠養胎白朮散主之
白朮散方 見外臺

白朮

芍藥

蜀椒

三分

牡蠣

右四味杵為散酒服一錢七日三服夜一服但苦
痛加芍藥心下毒痛倍加芍藥心煩吐痛不能食
飲加細辛一兩半夏大者二十枚服之後更以醋
漿水服之若嘔以醋漿水服之復不解者小麥汁
服之已後渴者大麥粥服之病雖愈服之勿置
妊婦脾虛弱則胎必墮故白朮以補脾氣牡蠣

金匱要略 卷之二十

能固胎，若窮散氣滯，運血，蜀椒，少加溫子宮，是所以能養胎也。

婦人傷胎，懷身腹滿，不得小便，從腰以下重，如有水氣狀，懷身七月，太陰當養，不養，此心氣實，當刺瀉勞宮及關元，小便微利則愈。見玉函

脉經云：婦人懷胎一月之時，足厥陰脉養；二月，足少陽脉養；三月，手心主脉養；四月，手少陽脉養；五月，足太陰脉養；六月，足陽明脉養；九月，足少陰脉養；十月，足太陽脉養。

金匱要略註解卷之二十 終

182

